

BABULON *LEH* HARMAGEDDON

CHÂNGVAWN: “A chalah chuan hê hming: **THURÛK, BABULON ROPUI, NAWHCHIZUARTE LEH LEIA THIL TENAWMTE NÛ tih a inziak a**” (*Thupuan 17:5, NKJV*).

SABBATH CHAWHNÛ

JUNE 16

Chhiar tûrte: *1 Lalte 18:1–40; Isaia 52:9; 1 Korin 15:1, 2; Thupuan 14:8; 16: 12–16, 19; Thupuan 18:1–10.*

KAN hriat tâk ang khân, *Thupuan* bû-ah hian Thuthlung Hlui bûten an lo sawi hlimthlâ leh ÷awngkam eng emaw zât hmuh tûr a awm a. Entîr nân, “Babulon” tih hming ringawt pawh hi vawi ruk lâi a lang. Nimahsela, *Thupuan* bû hi chuan hmân-lâia Nebukadnezzara lalram, kum za tam tak ral taa tlu chhe tawh chungchâng thû kha chu a sawi lo tih hria ila. A ziaktu Johana hian Thuthlung Hlui bûten an lo sawi ÷hin khawpui hming chu thutak sawi chhuah nân a hmang mai zâwk a ni. Chutiang chuan, Babulon—ram rorêlna leh sâkhaw thila Pathian mîte lo rap bet tawh ÷hîntu lalram thilithei tak mai chuan tâwpna huna a tih ang la ti ve lehtu tûr nungchang leh ziarâng chu a sawi fiah a ni tih hria ila.

Thuthlung Hlui lama thumal kan hmuh, Thuthlung Thar lamah erawh *Thupuan* bû-ah chiah kan hmuh chu *Harmagedon* tih hi a ni a. Hê thumal hi Hebrai ÷awng a÷anga chher chhuah niin, a awmzia chu “Megiddo Tlâng” tihna nia rin a ni a, hmân-lâi Israel rama hmun pakhat hming a ni. Harmageddon chungchângah hian ngaihdân hrang hrang a awm a, mi tam tak chuan hemi hmun Megiddo-ah

hian khawvêl tâwp dâwn hnaiah indona râpthlâk tak a thleng dâwn niin an ring a. Tûn kârah hian Babulon leh Harmageddon chungchâng kan thlîr ho dâwn a, hêng hming pahnihte hmang hian Bible-in eng thu nge min hrilh tih chu kan zir dâwn a ni.

SUNDAY

JUNE 17

“A thinurna uain chu”

***Thupuan* bûa Babulon sawina châng paruk, hêng—14:8; 16:19; 17:5; 18:2, 10, 21-te hi chhiar la. Thuthlung Hlui bûten Babulon chanchin an sawi dân kha rilrua hre reng chungin, hêng chângte hian ni hnuhnunga Babulon chêt dân tûr chungchâng eng nge min hrilh sawi rawh.**

Bible hi khawpui pahnih, ‘Jerusalem leh Babulon chanchin a ni e,’ tia sawi a ni ve thîn a. Bible hmun hrang hrangah hian Jerusalem chu Pathian leh thû a thlunpui a mîte khawpui sawina anga hman a nih lâiin (*Sâm 102:21; Isaia 52:9; 65:19, Thupuan 3:12*), Babulon erawh chu inawpbehna, tharum thawhna, sâkhaw dik lo leh uâlau taka Pathian laka helna entîrtu nia ngaih a ni vê thung.

Entîr nân, Babel In Sâng (*Genesis 11:9*) kha ngaihtuah ta ila. Hebrai tawnga “Babel” tih an sawina thumal tho hi “Babulon” ram sawina atân pawh hman a ni a. 1 Petera 5:13-ah chuan Peteran a lehkhathawn lo chhiartûte chu Babulon khuua kohhranhoten chibai an bûk thu a hrilh a. Mahse heta “Babulon” a tih hi chu hmânlâi Babulon khuua, tûnlâia Iraq kan tih tâk vêla awm thîn kha ni lovin, nakin lawka kohhran la rap bettu tûr Rome khawpui kha a ni zâwk nia ngaih a ni.

Thupuan 14:8 leh 18:3 chhiar la. Hêng thûte hian a chhe zâwnga Babulon khawpuiin khawvêl leh Pathian mîte a nghawng dân eng tin nge an sawi le?

Thupuan bû-a kan hmuh ang hian, Babulon-in a entîr thuneitu hûhâng dik lo tak mai chuan khawvêl pum pui hi a eng emaw kawng

tal chuan a fan chhuak vek a. “A mi ngaih chîn vâng a thinurna uain” (*Thupuan 14:8*) tih ɽawngkam hi thurin dik lo, zirtîrna dik lo leh thil chîn ɽa lo bâkah, chûngten an thlen rah ɽa lo tak takte sawina chu a ni a. Babulon chu “hnam zawng zawngte” tikhaw lo vektu sual a ni a. Chuvâng tak chuan, mi tin hian, an lo khawloh vê lohna tûrin an ngaihven a ngai rêng a ni.

Tûnlâi khawvêl hi han thlîr kual ila, hlemhlêtna, buaina leh inrahbehna tam tak kan hmû ang. Hei hian Isua-ah leh a Thu-a kan inthlun ngheh tlat a ngaihzia eng nge min hrilh le?

THAWHTANNÍ

JUNE 18

Babulon chu a tlâwm ta

Babulon hûhâng ɽa lo tak chuan khawvêl hi fan chhuak hneh tawh viau mah sela, eng tik nî-ah emaw chuan a la tâwp dâwn tho niin Thupuan Bû chuan min hrilh.

Thupuan 18:1–10 chhiar la. Hêng chângte hian “Babulon ropui” chungchâng eng nge min hrilh le?

Vântirhkoh pahnihna thuchahin Babulon tlûk thu a sawi kha (*Thupuan 14:8*) Thupuan 18:2-ah hian sawi nawn leh a ni a. He ɽawngkam hian sualna khura Babulon khawpui a luh thûk tawhzia a sawi Chiang hlê.

“Bible chuan LALPA lo kal leh hmian Setana chu ‘thiltihtheihna tin rêng te, chhinchhiahna tin rêng te, dâwt thilmak tin rêngte nêna lo kalin’ hnâ a thawk ang a; ‘chhandama an awm theihna tûra thutak hmangaihna pawm lotûte chu’ ‘inbumna chak tak, dâwt thu an âwih theihna tûrin’ kal san an la ni dâwn a ni tih a sawi a. 2 Thesalonika 2:9–11. Hetiang dinhmun hi a thlen a, Kristian ram zawng zawnga kohhran leh khawvêl a inzawm hun a thlen hmâ lo chuan Babulon tlâwmna chu a la famkim rih lo vang. Thil chu a tahtawlin a inthlâk chho zêl dâwn a, chuvângin Thupuan 14:8- a sawi pawh hi nakin deuha lo thleng tûr a la ni rih.”—Ellen G. White, *Indona Ropui*, pp. 389, 390.

Hê hrilhlâwkna hi tûnah hian a thleng famkim tawh em tih chu Pathian chauhin a hria ang a. Nimahsela, hêng chângten an sawi ang hian, thlarau lam Babulon hian eng tik nî-ah emaw chuan a sualna a nasat tawh êm avângin Pathian rorêlna a la hmachhawn dâwn tih chu kan hre tho a ni. “A sualnate chuan vân pawh a tawng ta hial a, Pathianin a thiltih fel lote pawh chu a hre reng sî a” (*Thupuan 18:5*). Hê ãawngkam hian Thuhlung Hlui lama hmânlai Babulon chungchâng sawina a rawn tilang a (*Jeremia 51:9*), rorêlna hun chu a lo thleng ngei dâwn tih a sawi bawk.

Hê rorêlna lo thlen tûr thù hian keini hi chu min ãhawng ve tûr a ni lo. A eng pawh chu lo ni se, hmânlai Babulon pawh khân rorêlna chu a lo hmachhawn tawh tho va (*Daniela 5 en la*). Pathian Lehkha Thu-a hmun eng emaw zâta hian mi tinin—Babulon pawh telin an thiltihte an sawifah ãeuh a la ngaih tûr thù chiang takin a sawi. Mahse keini Kristiante hi chuan chu rorêlnaah chuan kan âiawha ding tûr Sawipuitu kan nei tih kan hria a (*1 Johana 2:1; Daniela 7:22*). A va han thlamuanthlâk êm! Chuti ni lo se, Babulon chan âia kan chan a ãhat bîkna tûr a awm lo vang.

Hremna tâwk lova kal zêl ni maia lang rorêlna dik lote leh suahsualnate hian eng tik nî-ah emaw chuan Pathian hremna hnuhung ber chu an la hmachhawn dâwn a ni tih thuthiam hi eng ti nge i lo thlamuanpui ve theih ang?

THAWHLEHNÎ

JUNE 19

Harmageddon

Mi tam zâwk daihte hian—Kristiante zînga tam tak pawh telin—*Thupuan* bu chungchâng hi hre tam vak lo mah sela, he bûa hmun hming pakhat lo lang hi chuan an ngaihven tlâng hlawm hlê tho mai, chu chu *Harmageddon* tih hi a ni (*Thupuan 16:16 en la*). A sâkhua ang zâwnga la ve lêm lote pawhin hê thumal hi khawvêl hmâkhua hriltu tûr indona hnuhung ber sawina niin an ngâi deuh fur a ni. Lemchan siam chhuahna hmunpui Hollywood pawhin *Harmageddon* tia an phuah, kan chênna lei lam pana arsi kawngbo

(asteroid) lian tak pakhat rawn thlâwk mêk chanchin chu an siam a. Chutiang chuan sâkhaw mî ni ve lêm lote rilrû-ah pawh khawvêl tâwpna thlen tûr thû hi eng emaw chin chu a lo awm ve tho a ni.

Kristiante zînga tam tak, *Thupuan* bû chhiar ðhînte leh a thil sawite ring êm êmtûte chuan Harmageddon indona hi Middle East-ah khuan a tak takin khawvêl tâwp dâwn hnaiah a thleng dâwn niin an ngâi a. Mî ðhenkhat chuan Asia ram aţanga lo kal sipai maktaduai 200 rual chu Israel ram hmâr lamah an rawn lût hum hum mai dâwn niin an ring a. Mî ðhenkhat dang erawh chuan khawvêl hmun hrang hranga innghirngghona leh indona thleng mêkte hi Meggido hmuna Harmageddon indona-ah chuan chin fel ni dâwniin an sawi vê thung a ni.

Amaherawhchu, Bible hi chuan chutiingin a sawi hiauh lo. Harmageddon tih chu hnam hrang hrangte inbeihna ni lovin, lei leh vân pum huapa inbei reng pahnihte inbeihnain a vâwrtâwp a thlenna a ni zâwk a. Sum leh pâi thil emaw, ram rorêlna lam hawi emaw pawh ni lovin, sâkhaw lama inbeihna a ni zâwk; chutih rual chuan sum leh pâi leh ram rorêlna pawh a tel vêna chen chu a awm tho bawk.

Thupuan 16:12–16 chhiar la. Hêng chângte atang hian Harmageddon chungchâng eng nge kan hriat theih awm le?

Heta a ðawngkam hman hi entîr nei a ni hlawm tih lo hria ila. Dragon kê aţang leh sakawlh kê aţang leh zâwlnei der kê aţanga lo chhuak thlarau bawlhhlawh, chungû ang tak lo chhuak tih te a sawi a (hei hian Thupuan 13-a sakawlh pahnihte kha a kêwk a; tin, “zâwlnei der” a tih pawh hi Thupuan 13:11-in a sawi lei aţanga lo chhuak sakawlh kha a kêwk bawk). Hetah pawh hian indona ropui chu hmuh theih a ni leh bawk a, “ramhuai thlaraute” chu “Pathian Engkimtitheia ni ropui taka” indonaa mîte hruai khâwm tûrin an lo chhuak niin a sawi (*Thupuan 16:14*). Harmageddon thlen dân tûr chu eng pawh lo ni se, khawvêl pum huapa Krista mîte leh Setana mîte inbeihna a ni a. Chuvângin

heti lâia indona a sawi hi chu tûnlâi Israel ram kil pakhat, Megiddo vêla tual chhûng indona mai mai a ni lo tih a lang.

Thupuan 16:15 chhiar la. Hêng thilte a thlen mêk lâi hian, Isuan chanchin ̣a thuchah hmangin min fuih phûr a, a lo kal leh ngei tûr thû min hrilh mai bâkah, a felnaa thuam kan ngaihzia min hrilh a ni. Eng tin nge hei hian keini pawh kan tel vê-na indona hi thlarau lam thil a nih dân hrethiam thei tûrin puilh le?

NILÂNÎ

JUNE 20

Harmageddon leh Karmel Tlâng: Then 1-na

Hê Harmageddon indona ropui tak hi eng nge ni? A hmasa bera kan hriat tûr chu, he hming awmzia hi “Megiddo Tlâng” tihna niin a lang a. Nimahsela, Megiddo tia an hriat hmunah khu chuan tlâng pakhat mah a awm sî lo; a piah deuh lawkah erawh chuan Karmel Tlâng a awm thung a, chuvângin mithiamte chuan Megiddo Tlâng tih ̣awngkam hian Karmel Tlâng a kâwk niin an ngâi. Chu mai chu ni lovin, Karmel Tlânga Elija leh Baala puithiamte an inbeih thu kha Thupuan 13-in inbeihna a sawi entîrtu hi niin an ngâi leh bawk a ni.

Nimin lama kan hmuh tâk ang khân, Thupuan 16:13-in dragon, sakawlh leh zâwlnei der lo chhuak a hmuh thu a sawi hian Thupuan 13-a thil thlengte kha min kawh hmuh lêt leh a. Thupuan 13-a a sawite hian châng 13 leh châng 14-ah a vâwrtâwp an lo thleng ̣an a, sakawlh pahnihna chuan thil mak tak tak tiin, “mihringte hmuh theih tûrin vân ạangin mei a tlâktîr” hial a ni (*Thupuan 13:13*). Hêng a thiltihte hian Pathian leh Setana chu a inhmachhawntîr ta a, Pathian dik tak chibai bûktute leh “sakawlh lem” chibai bûktûte chu an inbei tawn ta a ni (*Thupuan 13:14*).

1 Lalte 18:1–18 chhiar la. Hetah hian *Thupuan* bûa kan hmuh tâwpna hun a thil thleng tûrte tilangtu eng thil nge thleng?

Heta kan thil hmuh hi Chiang taka indona ropui târlangtu a ni a. Elija hian an thu inchuh ber chu châng 18-ah hian târlangin, *Israel mîte khân Pathian dân an hawisan a, chu mai pawh chu ni lovin, pathian lemte chibai bûkin a zui bawk*. Mihringte chanchin kal tawh thlîr kîr ila, a lo lan chhuah dân chu eng pawh lo ni se, hemi tho hi thu inchuh chu a ni zêl tho lo vem ni? Chibai kan bûka chu “vân te, lei te, tuifinriat te, tuihnâte Siamtu chu” (*Thupuan 14:7*) nge ni a, mi dang emaw, thil dang emaw zâwk? Thupuan 13-a kan hmuhah hi chuan mîte hian LALPA ni lovin, sakawlh leh a lem chu chibai an bûk zâwk a. Hemi thû-ah hian tuilâi rapa awm a theih loh. Pathian lamah kan ãng a nih loh vêk chuan Setana lamah zâwk kan ãng tihna a ni. Chumi tak chu an thu inchuh pawimawhna pawh a ni rêng a, a bîk takin Harmageddon indonaah phei chuan, Karmel Tlânga thil thleng kan hmuh ang khân, a inkâwlhkalhzia hi a lang Chiang leh zual hlê dâwn a ni.

NINGÂNÍ

JUNE 21

Harmageddon leh Karmel Tlâng: Then 2-na

1 Lalte 18:18–40 chhiar la. Hemi tum hian eng thil nge thleng a, eng tin nge chu thil thleng chu a tâwp a, eng tin nge chu thil thleng chuan tâwpna huna indona ropuiin a vâwrtâwp a thlen huna thil lo thleng tûr chu a lo entîr le?

Karmel Tlânga inbeihna kha Pathian zâwlnei Elija leh Baala puithiam 450 zette inbeihna a ni a (sualin ãha a tam hnehzia hi lo chîk ang che). Hê an inbeihna hi tu nge Pathian dik tak chu ni tih fiahna tûr a ni a—vânte leh leite Siamtu Pathian chu nge ni a, “dragon” nungchang pholangtu leh khawvêl bum a tumna hmanrua Baal zâwk chu (*Thupuan 12:9*).

Puithiamte chuan an hâlral thil hlanrawn kâng ral vektu meirawn tîr tûrin Baala chu an ngên chiam a. Zîng kâr aţanga chawfâk hun thlengin an âu a. Chutah Elija lah chuan, “Âu ring ta che u le. A lo muhîl reng te hi a ni lo maw?” tiin a lo ti-el vêl a (*1 Lalte 18:27*).

Â chhuih khawpin an bei zêl a. Chemtê te-a inzaiin, an taksa aţang chuan thisen a chik chhuak zâwih zâwih mai a. Nî a lo thlang her a, tlâi lam inthâwi hun a lo thlen meuh chuan an beidawng ta a ni.

Elija hâlral thil thlan vê thung chu tuiin wawi thum lâi huh hnâp khawpin an leih a, mâichâm vêla tui luanna tûr an lai h khuarahte chuan a lî lung bawk. Chutichuan, Elija chu tâwi tê-in Pathian hnênah a ʔawngtâi ta a. Pathian chuanrawn chhâng nghâlin, a hâlral thilthlan mai pawh ni lovin, thing te, mâichâm siamna lung te, leh vaivut nêl lam a kâng ral ta vek a. Pathian dik tak thiltihtheihna chu Baala han khin phâk zia zâng a ni lo tih chu Chiang takin a lo lang ta a ni.

Thupuan 16:13; 19:20, 21 chhiar la, chutichuan, hêng chângte hi Baala puithiamte chan nêl khân khâikhin ang che. Hetah hian eng nge kan hmuh?

Tûn dinhmunah chuan Harmageddon chungchâng hi a kip a kâwiin hre fiah kîlh kêlh lo pawh ni mah ila, a rah chhuah erawh chu kan hre tho mai: Pathian hmêlmâte chu tihboral an ni ang a, tin, Pathian leh a mi thianglimte dikzia pawh pho lan a ni bawk dâwn a ni.

1 Korin 15:1, 2 chhiar la. A boruak leh chheh vêl hi Harmageddon nêl chuan thuhmun ni lo mah sela, Paula thil sawi tak hi eng nge ni a, eng vângin nge chu chu keini tân hian, a bîk takin thil lo la thelng tûrte han thlîr hian, hriat reng a tûl le? Harmageddon chungchâng sawina Thupuan 16:15 pawh hi chhiar la. Hêng chângte hian eng nge min hrilh?

ZIRTÂWPNÎ

JUNE 22

Ngaihtuah tûr: “Harmageddon indona chungchâng sawina hmun tam takah, ransa leh nungcha râpthlâk pui pui leh thil thleng râp thlâk tak takte târlan niin, chûng chuan an nihphung âwm eng eng emaw chu a târlang thei âwm e. Kan hmuh tâk ang khân, chûng zînga pakhat chu Thupuan 16:15 thû:

‘Ngâi teh, rûkrû angin ka lo kal dâwn e; inringa puan veng chu a eng a thâwl e, chutilochuan saruakin a lêng ang a, a zahmawh chu an hmu dah ang e’ tih hi a ni. Hê thû, Bible-a hmun pakhat lai lâi taka awm, Harmageddon tih hming pawh a lanna ngei mai hian Thuthlung Thara châng tam takten Isua lo kal lehna leh tâwpna huna thil thlengte chungchâng an sawi chu a rawn tuihnih ve leh chiah a ni.

“A dang leh chu Thupuan 17:14 hi a ni vê thung a: ‘Chûngte chuan Berâm No chu an do rawn dâwn a; mahse Berâm No chuan—hotûte Hotu leh lalte Lal a nih avângin—anniho chu a hneh ang a; tin, a hnêna an awmte chu koh te, thlan te leh rinawm te an ni’ (zirlai bu ziaktu lehlin dân). Hê indona râphtlâk tak maiah hian hmanrua nêna mi dang beih vê tum miah lo, Pathianin a kohnaah leh a thlannaah erawh rinawm tum tlatte chu do rawn an ni dâwn a. Hê indona hi chu tûnlâi huna kan hriat ðan êm êm hnam ðhenkhatte leh hel pâwlhote pawhin an beih ang nêh hi chuan inang lo tak a ni. Ka sawi fo tawh angin, Harmageddon indona hi chu rilru hmin zâwktu nih tum inbeihna a ni a. Thilnung luahtu zâwk nih tuma inbeihna—Berâm No talh tawha laka thilnung taka rinawm tûra kohna a ni (*Thupuan 5:9, 10, 12; 13:8*).” —Jon Paulien, *Harmageddon at the Door* (Hagerstown, Md.: Autumn House Publishing, a division of Review and Herald Publishing Association, 2008), p. 193.

SAWI HO TÛRTE:

- ❶ ***Thupuan* bûa thil thleng tam tak kan hmuhte hi a thlenna hmun a sawiah hian a tak takin a thleng dâwn nia ngaitûte hi eng tin nge i ðanpui theih ang? Chutianga a tak taka thleng tûr nia hrihfiyah chu a dik loh dân eng tin nge kan sawifiahsak theih ang?**
- ❷ **Kan hmuh tâk ang khân, Babulon hûhâng chuan khawvêl zawng zawng hi a fan chhuak a. Babulon zirtîrna ðhenkhat chu engte nge ni a, chûngte chu eng tin nge kan lo hriat hran theih ang a, a lak ata eng tin nge kan inthiar fihlîm theih ang?**